

INUIT ATAQATIGIIT

INATSISARTUNI



UPA2024/14

23.05.2024

Pipaluk Lynge

Nunanut Allanut tunngasutigut naalakkersuinikkut ingerlatsineq pillugu nassuaat 2023

Naalagaaffinngornissamut Nunanullu allanut Naalakkersuisoq

Oqaaseqaat:

Nunarsuarmioqataavugut. Qeqertarput avinngarusimagaluartoq, niuernikkut, suleqateqarnikkut, silap pissusaata allanngoriartornerata ilutigisaanik nerisassaqarnikkut, imeqarnikkut, nunallu aseroriartornerata ilutigisaannik inuit ingerlaarnerata, inooriaatsitigullu nunarsuarmioqatitta atugaat, uatsinnut sunniuttarput, naak ullormiit ullormut nunarsuarmioqatitta atugaat uatsinnut tunneq ajoraluwartut, nunarsuarmioqataagatta, aamma uatsinnut sunniuttarput. Inuit Ataqatigiinniit isumaqarpugut nunani allani pisut nunatsinnut sunniutai malunnarsileruttortut. Aamma akitigut.

Ruslandip Ukrainemut saassussinerata kinguneraa Ruslandimut mattussinerput. Ruslandi tunisassiornikkut suleqatigiinnikkullu arlalitsigut mattuttarput, tamanna isumaqarpoq Ruslandimi naggueqatitta aamma mattunneri.

ICCip ukiorpassuarni anguniarsimasaat, naggueqatitsinnik Ruslandimiittunik attaveqarnissatta ammaasimanerat, ullormiit ullormut mattupparput.

Inuit Ataqatigiinniit naleqartitatta ilaraat inuit pisinnaatitaaffi. Inuit pisinnaatitaaffiisa toqqammavigalugit suleqateqarsinnaanissaq, naligiissumik ataqeqatigiissumillu. Tassani pingaartipparput naggueqatitsinnik, nunallu inoqqaavinik suleqateqarsinnaanissaq, nunap inoqqaavi allat peqatigalugit

INUIT ATAQATIGIIT

INATSISARTUNI



pisinnaatitaaffitta illersornissaat pingaartillugit nunanut allanut
suleqateqarsinnaaneq Inuit Ataqatigiinniit sulissutiguassallugit.

Kingumut pisut eqqartortillugit, siunissamut aamma isigniartariaqarpugut. Naggueqatitta mattunnerat Inuit Ataqatigiinniit siunniupparput nagueqatitsinnut assagut isaateqqinnissaat. Taamaattumik Arktisk Råd aqqutigalugu tamanna siunniuttariaqaripput isumaqarpugut.

Taamaattumik Inuit Ataqatigiinni siulittaasutta Mute Bourup Egedep Nunat Avannarliit Siunnersuisoqatigiivinut oqariartornera taperserparput. Nunanik allanik suleqateqarusuprugut, suleqateqartariaqarpugut. Suleqatigiinnermili naligiittut pineqartariaqarpugut, ataqeqatigiissumik immikkoortitsinngitsumik.

Nunat Avannarliit Siunnersuisoqatigiivinit Naalakkersuisut siulittaasuata peqataajunnaarallarnerata kingorna, ilisimavarput nunat allat qaaqusaasimanngitsut, Åland aamma Savalimmiormiut taperseraatigut, qujarukkaatigullu killiliigatta. Killiliineq ajorutta, qanorsuaq pineqarnissarput akuersaarutsigu, suleqatigeeriaaseq peqqinnangittooq inooqataaffigileroorsinnaavarput, imminut naleqartinnerput qimallugu, ineriartorfiunngitsumillu ingerlalerosoorsinnaalluta. Suleqateqarniarutta, taamma aamma uatsinnut peqqinnartuuusariaqarpoq ineritsiffiusariaqarlunilu. Taamaattumik Nunat Avannarliit Siunnersuisoqatigiivisa ataatsimiitaliaasigut Helsingfossimi isumaqatigiissutip nutarterneqarnissaa taperserparput, siunissami naligiissutut suleqatigiinnissarput anguniarlugu.

Uagut pineqartilluta avaqqunneqassanngilagut. Nunatut namminiilivinniarutta, nunanik allanik suleqateqarnissaq pingaaruteqarluinnarpoq. Taamaattumik Inuit Ataqatigiinniit isumaqarpugut nunatta avataani aallartitaqarfigut tamarmik politikkikkut, niuernikkut kulturikkullu sullillutalu avammut isileraatigut.

INUIT ATAQATIGIIT

INATSISARTUNI



Nunatsinniik avinngarusimasumiit avatitsinni pisunut malinnaanissaq killeqarpoq, aammattaaq nunatsinniit siuarsaanissaq killeqarpoq, niuernikkut politikkikkut kultoorikkullu. Silap pissusaata allangngoriartornera ilutigalugu nunani tamalaani malunniutit suunersut, qanorlu uatsinnut sunniisinnaanersut, ilaatigut aallartitaqarnermi maluginiutit ilagaat. Aammattaaq Inuit Ataqatigiinniit naleqartitatta ilaat, suaassuseq apeqqutaatinnagu naligiittut inuunissatta sulissutiginissaa pingaartitaraarput, taamaammat aallartitaqarfitta nuna najugaanni suliniutit qanoq ittut atorneqarnersut isigniarneri, periarfissat ilagaat, soorlu Islandimi arnat angutillu akornanni naligiinnissaq, suaassuseq suugaluarnersoq, inooriaaseq suugaluarnersoq apeqqutaatinnagu naleqartitsinerat inatsiseqarnerallu, maligassiuisussatsialasut Inuit Ataqatigiinniit isumaqarpugut. Island eqqartortillugu aalisarnermik tunisasseeriaasiat, aalisariaasiat tarrarsorfissatut suleqatissatullu isigaagut, suleqatigiikkumanerallu assannillu isaassisarnerat Inuit Ataqatigiinniit qujaniarfigerusuppagut.

Taamaattumik aallartitagut tamarmik Islandimi, USAmi, Beijingimi, Bruxellesimiittullu qutsavissaqarfigaagut, aningaasatigut taamaallaat nalilersunngikkaluarlugit, uatsinnulli inerititsiviusussatut, politikkikkut, kultoorikkut niuernikkullu aqqutissiuussisussatut naleqartikkatsigit, sulilluarnissaannik kissaappagut.

Inuit Ataqatigiinniit nunannaarutigeqaarput Tartupaluk pillugu Canadalu isumaqatigiissuteqarnerput. Naggueqatitsinnut nunaqqatitsinnullu pingaarutilerujussuuvoq, qanimullu suleqatigiissuteqarsinnaanissarput Inuit Ataqatigiinniit qilanaaraarput.

Kunngeqarfiup imartatta sikujuartup aakkiartornerani, avannaarsuani immap killilernissaanut sulissuteqarnera malinnaavigaarput, ilisimavarpullu

INUIT ATAQATIGIIT

INATSISARTUNI



ukiorpaalunni suliniut taanna ingerlasinnaasoq, taamaattumik Naalakkersuisunit Arctic Ocean Workshopilu pillugu suliniutinut malinnaasinneqarnerput nuannaarutigaarput, neriuppugullu innuttaasut qanumut aamma malinnaatinneqassasut, nunanut allanut, imartatsinnullu tunngasunik innuttaasut peqataaninneqarnissaat Inuit Ataqatigiinniit pingaartikkatsigu.

Inuit Ataqatigiinniit nunat akornanni nunatsinnilu eqqissineq pingaartipparput. Sorsunnerit nunatta avataani pipput, tamakkulu nunatsinnut sunniuteqarput, akit qaffapput, nunarsuup ilisarnarunnaariatornera malunnarpoq, meeqqattalu siunissaat, sorsunnerit, silap pissusaata allanngoriatorneratalu nassatai allannguuteqarnerilu malunnarsiartuinnartut ataatsimoorluta suleqatigiissutigisariaqarigut Inuit Ataqatigiinniit isumaqarpugut.

Nunanut allanut, Sillimaniarnermut Illersornissamillu Politikkissaanut Periusissiaq partit tamarmik, ataaseq minillugu atsiukkatta, nunat allat nunattalu innuttaasuisa suna siunnerfigineripput nalorninarunnaarsippaa.

Inuit Ataqatigiinniit pingaartipparput inuiattut ilisarnaatigilissagipput, Pineqartilluta ilaassaagut. G-60imissuulli innuttaasut isiginnaaginnartuinnanngussanngippata, nunatta ineriarornerani nunaqqatigut peqataatinneqartariaqarput, inoqarfiit pillugit pilersaarusioneremi, nunat allat suleqatiginerisigut taamatuttaaq sillimaniarneq eqqarsaatigalugu.

Taamaattumik Inuit Ataqatigiinniit nuannaarutigaarput upalungaarsimanermut ilinniarfiup Kangerlussuarmi periarfissanngornera, aammalu sulissutigigatsigu illersornissamut suleqateqarnitsigut pineqartilluta peqataatinneqartarnissarput, politikeritut, minnerunngitsumilli innuttaasut pineqartut peqataatinneqarnissaat.

Nunat allat niueqatigingikkutsigit nunatsinni aningaasarsiornikkut ajornakusuussaagut. Taamaattumik Inuit Ataqatigiinniit pingaartipparput

INUIT ATAQATIGIIT

INATSISARTUNI



pisisartup piumasaasa tusarnaarsinnaanissaat. Silap pissusaa allanngoriartorpoq, immap kissakkiartornerani uumasut ullormiit ullormut peerussinnaasalerput, nungusaataanngitsumillu aalisarneq piniarnerlu pingaartinneqalerput, taamaattumik piujuartitsisumik aalsianngikkutta piniarlataluunniit, pisisartoq piujuartitsisumik pilersuisoq ujartussavaa. Taamaattumik Inuit Ataqatigiinniit aalingersukkat siunnerfiit pilersaarusiorgineranni, piujuartitsisumik tikkuussinissarput pingaartipparput, minnerunngitsumillu kinguaatta siunissaat pingaartillugu, siunissaq inooqataaffigisinnaasarput sanarfiumallugu, piujuartitsisumik ingerlaaseqarnissarput Inuit Ataqatigiinniit pingaartipparput, taamaattumik Parisimut Isumaqtigiiissummut Naalakkersuisut peqataannginnitta allanngortinnissaannut sulissuteqalermata qujarupparput, nunaqqatitsinnut nunanullu allanut nalorninaronnaarmat, nunarput sumut siunnerfeqarnersoq.

Qujanaq.